

RADIO SCIENCE SERIAL
SUSTAINABLE DEVELOPMENT
'LIFE MUST GO ON- LIFE JAI THAKI BOLE LAGE'
INTERACTIVE
EPISODE - 16

Jovi- Duijon kotha kuri bole sopse poila tu ase, mati niche te chola bole pa aro hawa paani upor te kisoman kotha patra kuri bo. Etea sop manu bi koi ase aro hunea ase, global warming, etu kotha he koi ase. Toh etu tu hoile manuhar khan para green house effect ako bi bhara dea nimate koi ase dae. Ja century te mati niche te fossil fuels mane- chola ba jula bole pa khan, kaala pather aro tel julai dea he, atmospheric carbon dioxide thakea ke bishi hobole di she dae.

Sita- Hoi ho, etu para hawa paani ke bishi letra kuri di ase.

Jovi- Aro amar khan kharkhana khan alak- alak khan cholai ase, aro etu para pollution bishi jai ase, etu khan jai kena green house ke effect kuri ase mane beya kuri ase. Etu kile hoi ase koile, kaala pather ba tel jula tu, aro chola tu, aakash te nah, oxygen logot carbon milai loi kena carbon dioxide banai loi etu nimate he ase dae. Aro amar manuhar khan, industry kharkhana karone, mati ke sapha mane- gaas khuri khan kati dea aro dusra kisim-kisim kam kurea bi green house gases uthi bo di ase. Amar khan laga capital Delhi ke sopse poila loi sa bi, jitea kohasa mosto para city ke bon kuri jabo, aro joldi para sapha hobo, etu bi nahoi toh nah, manu khan bishi duk pai toh nah.

Sita- Hoi hosa ase, dagor dagor zila khan te tu hoile, paani te sabi nah, letra nah? kharkhana khan para letra aha, moila kuri kena ami khan khai kena gao ke bishi beya kuri di thake. Delhi te Dr ekjon para koa ami etea bi mon te ase, tar koa tu hoile Delhi laga hawa kha tu hoile, ekdin te dusta cigarettes kha logote eki ase koi she. Cigarette kha tu charea bi laap nai koi she.

Jovi- Hosa ase. Saal 2002-2012 tak te gari khan 97% uthi kena pollution aro toxic dhunga bishi ani di she. Paani dhunga tu.... khali ekta effect amar khan dikhea he ase.

Sita- Hoi, hoi hosa ase, aro moi ekta janea tu nah, amar state Nagaland te hoile bi amar khan ke natural resources ekdom bhal para, prakiti tu bhal hoi kena, Esor para ami khan ke ekta natural resources di kena ase. Aro amar khan state bitor te, amar khan coal mining dikhi ase aro, aji kali tu, etu amar state bitor te bi kuri kena jai ase. Etu coal ula laga amar state Nagaland te aata district dikhi ase. Etu ula tu hoile, 1842 saal te pa suru hoi she aro amar khan coal mining, kaala pather pa laga jaga khan, etu amar state Nagaland khan te, ahi kena, Nagaland Pollution Control Board koi kena NPCB 2015 te janai dea hoishe. Aro ahi kena amar state Nagaland te Deptt: of Geology And Mining laga niche te, kaala pather laga policy koi kena 2006 bi ulai kena ase. Aro, amar khan etu kaala pather laga kinika hisap te loi cholai jabo kinika etu loi laap pabo, etu laga te bi age bari kena jai ase. Aro amar khan state laga niche te hoile bi, article 371 te hoile bi amar khan land resources niche te amar khan etu kaala pather laga, kam tu hoile, constitution te hoile bi likhi kena ase amar state Nagaland te.

Jovi- Oh... amar state Nagaland te bi pai ase, ekdin etu khan ulai kena, nahoi le bi ulai kena cholai ase, hoile bi etu khan amar khan husair para nacholai kena thaki she koile, amar khan laga hawa ke beya kuri di kena, etu para he, amar khan laga green house effect- beya kuri di ase. Etu sop manu ke janai di bole dorkar ase. Hoi, etea Central Pollution Control Board para, saal 2010 te koa ekta tu, CNG- Compress Natural Gas para pola gari khan, matter pollution 7% he ase koi she dae. Capital te Nitrogen Dioxide total tu.... 10% nishina ase koi she. Toh.... ahi kena khali, amar desh India khali he nahoi kena, pura prithibi te etu dikdar tu koi ase. Jor para pula cars khan nah! particles- mihin chhoto-chhoto chari de nah etu khan ke koi. Hawa natha ka thanda season bitor te, pollution air borne pollutant jama, etu bi bishi8 bhak kaala pather chola nimite, hawa moila kuri di kena, city pura te mosto kohasa layer banai kena sop jaga pollute kuri dea.

Sita- Hoitoh hoitoh... sop jaga te etu hunea aro dikhi pai ase ho etea tu nah! Aro, ghaam para beya rays khan para amar khan ke bachai enika bi koa huni she nah! Toh.... mati level bi ase nah kinika?

Jovi- Hoi, mati- ground level ozone tu nah! thik mati upor te color rang nathaka aro ekdom hili bole he thaka gas para bana hoi. Etu ke secondary pollutant bele mate dae! kile mane, jitea ghaam aro hawa jama hoi kena thanda- primary pollutants react hoi jai, titea etu hoi jai. Nitrogen oxides 95% tu nah! manuhar khan kaala pather, gasoline chola aro motor gari khan nah! ghor khan te industry kharkhana nah! aro power plants khan te, tel chola nimite hoi ase koi kena bi ase dae.

Sita- Hoi hosa ase ho.... ami bi apunar ke kobo mon thaka tu nah! ami khan energy hisap te mati niche te pa khan thik para chola bole lage. Etu khan ami khan jani bole lage. Ki nimite koile, ami khan ekta para ekta najani kena, ekta he enika he jai thaki le, sop thik naho bo etu karone ami khan, energy nimite dorkar, fossil fuels- mati niche te chola bole pa khan upor te nah! ami khan jani bole lage. Aro, fossil fuels koa tu hoile tinta kisim te ase, etu tinta tu ase.... kaala pather- nahoi le bi coal koi thaka, aro tel, aro natural gas etu khan ase. Aro etu khan bitor te hoi le bi, petroleum tu bishi bhak te cholai. Aro ami khan fossil fuels khan, ekbar tu bishi pai thaki kena dikhe. Kintu, etea tu hoile joldi- joldi para komti hoi ase.

Jovi- Kile mane..... dhamadham pai ase, cholai ase, hoile bi, amar khan etea chola tu duniya te chola tu sai she koile dhamadham chola ase toh nah!

Sita- Hoitoh. Aro amar manuhar khan aaram para aro bishi cholai dea nimite bi ase toh. Etu tinta tu, amar khan bachai rakhi she koile mane aha laga din te, amar khan aaram para thaki bole pari bo.

Jovi- Apunar koa nishina, manu tu hoile, jiman bishi pabo, ki hoile bi nah! eman bishi chola bo. Ahi din karone bachai rakhi bo etu nai, etu laga bhabana tu mon te na rakhe toh.

Sita- Sop manu bi, komti hoa aro bishi pabole kurea mane- bishi produce kuri bole aro noutun phele para energy pabole kotha tu koi, kile mane.... energy natha kile duniya tu a-ge jabole napari bo. Aro industries khan te, etu khan sop lagi ase. Ghar kam nimite lage, gari tak te bi lage toh. Aro kisim- kisim functions khan te lagi ase. Aro, ahi kena pu-ra likha education phele hoi le bi, aro aaram aro ghor kam karone bi energy lage. Ami khan ene bohi thaki le bi, sabi! pangkha khan, light khan, AC khan cholai kena energy kiman noksan

kure nah! Earth crust mane.... mati pathor bitor te tel pai thaka tu ami khan limited mane-ekta hisap te he pai thake. Aro khotom hobole parea laga ase. Aro amar manuhar khan tu, bishi- bishi hoi ase nah! mane pollution bishi hoi ase.

Jovi- Hoitoh! din- din te, saal- saal te bishi- bishi hoi ase.

Sita- Hoitoh. etu karone amar khan nathaki le naho bo, etu nahoi kena lobole he lage etu dorkar, dagor te he hoi jai ase toh manu khan laga bhabana nah! enika nahobo lage. Petroleum tel tu hoi le factories aro gari khan te cholai. Tar khan tu, hydro carbon he ase toh aro gari engines, samaan aro generators khan te cholai loa pichot hawa ke aro moila kuri dea. Etu nimite, petroleum tel ke amar khan khali chola bole he janea nahoi kena nah! kinika etu ke bachai rakhi bole lage, kinika hisap ekta te chola bole lage etu khan nium khan jani kena cholai le bi, ekta hisap te loi-chola bole lage ho.

Jovi- Hoi, bhabi saile tu ek kisim tu... etu khan tu chola bole he lage, nacholai le tu, etu duniya te jinda thaki bole napari bo nishina ase. Hoile bi amar khan, loi kena ase koi kena dhamadham chola para beya ase etu he apuni koi ase nah!

Sita- Hoitoh. Amar khan hodai ekta jinis chola upor te tu alop nahoi kena thik- thak jani kena he chola bole lage. Koi dea nishina, eku nabhabi kena pai ase koi kena khushi- khushi cholai aro hawa paani karone nabhabi kena chola tu amar khan nijor he piche te duk pai toh nah!

Jovi- Hoitoh, hoitoh. Achha toh.... ami manu logot PCRA enika ekta huni she apunar jani ase koi le alop koi di le bhal.

Sita- Achha.... PCRA koa tu hoile, Petroleum Conservation Research and Association koi. amar khan kharkhana dagor- dagor khan te nah! etu ekela te modot dea nahoi kena etu LPG aro CNG ke bi bachai rakhi bole, hohai de etu nah! Aro manu khan ke bi modot dea. Jani bole ba chola bole ekdom asani tips tar khan dea tu amar khan mani she koile nah! gas juntu amar khan ekdom daam para chola nahoi le bi, bachai kena rakhi bole pare. Etu karone ami khan tar khan laga PCRA tu manu khan ke bishi modot dea ekta ase.

Jovi- Ooo.... etu hoile etu bi dorkar ekta ase toh nah!

Sita- Ummm... Kha loa khan paka time te bi nah! tar laga dhakna khan bon kuri kena pakai she koile gas bi komti khabo aro ami khan paka tu bi joldi para paki jabo. Toh... etea moi koa nishina, apunar bi kinika kuri kena, energy tu hoile, mati niche te pai thaka khan ke ami khan bacha bole lage, etu apuni bi alop tu buji she hola nah?

Jovi- Hoitoh.

Sita- Aro ami bisas kuri ase, hunea manu khan bi huni kena amar duijon koa hisap te loi-mon te rakhi kena cholai jai she koile mane bishi bhal hobo.

Jovi- Hoi, hoi... aro etea aro bi eki logot, thaka homoi te nah moi... ekta topic upor te koi di bo. Etu ase.... amar laga! aha laga, din, bhal future te jabo karone, ki kuri bole lage, etu upor te apunar ke kisoman kotha kobo, aro eki logot kotha patra kuri bo. 2014 saal bitor te, renewable para electricity produced kurea total tu... 19.2% nishina thaki she koi she. Toh...

ahi kena 2015 te... non conventional phele para energy 147 giga watt te ako uthi she koi she. Bishi bhal nah?

Sita- Hoitoh! Oooo.... etu mane....renewable energy bana bole national aro international level te encourage kuri she naki?

Jovi- Hoitoh, hoitoh.. ap0unar thik koishe. Etea duniya te nah! by 2030 sop citizen khan nah! pai thaki bole tel, aro electricity sapha aro sosta di bole UNO sesta kuri ase etea. Yate, renewable- ako bi banai kena pabole paree energy he dagor bhak lobole ase. Etu ekela nahoi kena fuel, aro energy chola bole paree bi 2030 pungchi kena tu... double kuri di bole ase enika koi ase dae.

Sita- Achha toh.... renewable energy upor te amar khan desh te bi kam tu bishi kuri ase hola nah?

Jovi- Hoitoh! kam tu bishi kuri ase. 2016 saal bitor te bi nah! 14.7% nishina paishe. Apunar jani ase na nai, 2016 saal te he nah! renewable- ako bi banai loa khan para electricity pa tu 44.812 giga watt ekela thaki she.

Sita- Hoi, moi bi hunea tu huni she, aro dusra renewable energy khan tu ki-ki ase.

Jovi- Dusra alak- alak ase... alak dusra para pa tu hoi le... tidal aro geo- thermal energy para bi pai dae. Renewable aro non conventional energy pai. Aji kali tu, solar energy technology lagea tu bishi hoi ase, etu duita bhak lobole he lage. Kile mane, mati niche te chola bole pa... fuels khan pai thaki bole nahoi. Kaala pather, diesel enika khan tu, limited-kom ase. Toh.... ami khan etu khan upor khan te depend kuri bole laga nahoi. Kitea khotom hobo najane toh nah! Aro din- din te.... sustain aro development kam khan karone, amar khan energy aro fuels khan lagea tu uthi thake tu nah! etu logote, amar khan laga hawa paani karone green house khan dikdar bi bishi uthi ase, aro din- din te bari- bari ase.

Sita- Aro amar khan laga desh te bi nah! solar mission project enika khan naam niche te, project bishi chuli ase koi kena ami huni she etu hosa naki?

Jovi- Hoi etu hosa ase. Aro ekdom joldi para kam jai ase, international community karone, United Nation para kisoman target bi banai kena ase dae. Etu khan bitor te sosta aro, lobole paree energy te duniya te sop citizen karone, khuli dea ase. Renewable energy tu, asol hobo. By 2030, pungchi kena tu, amar khan energy thik aro, lagea hisap te chola bole ke, uthi bole he lage. Fuel aro energy efficiency by 2030 pungchi kena, double hobole di bole lage. Amar khan electricity 1 unit bachai she koile, power chola 1.33 units bachai dea logot eki he ase, etu jani bole tu dorkar ase dae!

Sita- Hosa ase, ami khan jani kena etu laga hisap te chola bole lage.

Jovi- Aro nah, renewable energy chola uthi bo karone nah, India sorkar para bhal bhabana loi loishe dae. Etea- etea tu.... solar winds enika khan aro dusra, renewable energy para, thirty two thousand mega watts energy pai ase. Saal 2022 pungchi kena tu, amar khan laga sorkar para nah! one lakhs seventy five thousand mega watts te, uthi di bole khujis kuri ase. Toh.... etu tu bishi uthi ase toh nah! A-ge te nahoi le bi etea hisap te tu hoile, thirty two mega watts he ase toh nah! toh... jai kena 2022 te , one lakhs seventy five thousand mega watts te uthi bo koa tu... bishi hoishe toh. Toh.... giga watts te saile, etu...

one hundred seventy five hobo dae. Enika hoi kena etea amar khan, kinika kuri kena amar khan laga, aha khan laga homoi, aha future tu bhal hobo, etu karone amar sorkar bi bhabana loi kena alak- alak raasta te bhabana loi kena amar khan ke bi di ase, toh... mar khan bi, etu khan bhal para cholai kena ki hisap te loi kena etu khan hawa paani tu bhal para bachai rakhi bo lagi bo etu upor te amar khan etu khan mon te rakhi kena hodai thaki bole dorkar ase dae.

Sita- Hosa ase, apunar thik koi she ami bi bishi buji paishe. Ami khan etu energy tu kinika kuri kena thik phele para chola bole pari bo aro kinika bachai rakhi bole pari bo nah! Ami khan sai she koile mane... commo9n manu khan, din- din te energy upor te duk lok pa tu, aro kinika kuri le bhal hobo, etu upor te bishi kam kuri ase toh. Aro kaunu ba manu tu hoi le cholai ase, eku bhal beya najani kena cholai ase, khushi- khushi light te ho bi, paani te ho bi, ji te ho bi nah! amar khan etu rukha bole sesta kuri bole lage, hisap te chola bole lage. Ami apunar ke kobole mon thaka tu... amar khan kile power kom lok pai thake, ahi kena amar state bitor te, amar state Nagaland te hoi le bi, amar khan sai le... poila- poila homoi te tu sa bi toh.... load shedding hoi kena light bi eman napai. Kitea students khan exam khan di bole homoi pungchi bo.... light nathaki bo, hawa mari bo light natha ki bo, eman light laga problem thake. Kintu... aji kali laga homoi te sai le, ami khan etu technology hoi le bi ekta hisap te loi cholai, aro manu khan bi civilize hoi kena, ekta thik hisap te power khan bi chola karone nah! amar khan etea laga homoi te tu, sabi! light khan bi eman ja tu nadi khe toh thik homoi te amar khan dorkar laga light khan bi pai ase. Etu karone, aha laga din te hoi le bi nah! ami khan kinika kuri kena light tu bachai rakhi bo etu khan bi ami khan jani bole lage.

Jovi- Hoi apunar koa nishina, manu khan etea jankari khan loi kena aro pai kena bi nah! kinika ami khan light khan nahoi le bi ki- ki hoile bi, etu power khan tu na lagea homoi te bachai kena rakhi bo, bon kuri kena rakhi bo etu laga niium tu manu khan jani jai ase toh nah!

Sita- Hoi etu karone, amar khan power chola bo koile bi, dorkar homoi te chola bo, na chola homoi te bon kuri bole lage. Aro ami khan enika thik hisap te he ami khan deficit tu banai kena power hoi le bi cholai she koi le mane, ami khan bishi bacha bole pare.

Jovi- Achha toh nah! ami khan kinika electricity tu thik para chola bole lage. Apunar bhal para koi di bi.

Sita- Parea tak! morom kuri kena ekta ami khan mati laga survey thaka nishina ami khan thik thak sai kena he ami khan chola bole lage. Dorkar te hoi le bi, ami khan ekta hisap te loi chola bole lage, chola khotom hoishe koile ami khan bon kuri di bo lage. Aro ami bhabea hisap te judi ami khan.... dusra jati khan ekela nahoi kena, ahi kena LED bulbs khan nishina nah!

Jovi- Ooo.... aji kali etu bishi cholai ase. LED bulb tu hoile power komti khai nah!

Sita- Hoi.. power komti khai. Aro CFL bulb koi thake nah! etu logote sai she koi le mane... hawa paani ke bi nachoi dae. Beya kurea nahoi le bi ami khan ke side effect dea etu eku nai. Bishi bhal ekta ase. Aro.... LED lamps khan cholai le nah! kom kha logot light bi bhal. Mane... ujali bi bishi bhal. Aro moi apuni ke nah! etea aro kinika kuri kena, ami khan conservation practices, mane.... ami khan laga jeevan tu jai thaki bole karone, kinika ami

khan kha- loa khan ke hoi le bi, nahoi le bi alak dorkar jinis khan ke ami khan bachai rakhi bole pari bo etu upor te alop kobo dae. First ahi kena amar state Nagaland te sai le mane... kheti bari kurea tu amar khan, bishi bhak tu kheti bari kuri kena apuni bi jani ase, aro ami khan etu tu hoi le.... traditional niu hisap te kuri kena ahi ase, aro ami khan kheti bari kurea tu hoi le bi, poila homoi te tu... kisim dawai khan puk-puka khan mora bole ase, nahoi le bi, anach khan bhal bana bo koi kena dawai khan bi bishi cholai kena ahi she nah! Toh... etu chola tu hoi le, amar khan laga mati sabi! eman fertile thaka- mol bishi thaka, etu khan bi sop morai di she nah! Ami khan etu chola para, paani bi letra banai dea, juntu khan jai kena paani kha homoi te mori ja bi enika di khe. Toh... ami khan etu nacholai kena hoi le bi, ami khan kheti bari kuri kena tu... aji kali organic farming, etu hisap te nah!

Jovi- Umm... hoi etu laga kotha tu manu bi bishi koi ase aji kali.

Sita- Hoi, ami khan, dawai khan eku nacholai kena ki nimite koi le dawai chola laga, anach khan ho bi, tenga phool, sak- sobji khan hoi le bi kha homoi te nah! ami khan sa bole tu sundoor nishina dikhe, kintu... kha homoi te, manu laga gao ke dikdari te pungchai dea aro ami khan nabhabea laga duk- suk bimar khan bi nah! ula tu ami khan di khe.

Jovi- Hoi, manu khan koi ase.... etu, dawai... ami khan fertilizers koa alak- alak bishi ase toh nah! Toh... etu khan loi kena, ami khan dhamadham kheti te cholai ase, toh... etu khan chola karone, ami khan hoi! anach khan tu bishi bhal para ulai ase, kintu.... etu khan kha para, amar khan laga gao ke beya kuri dea nahoi le bi, poila- poila najanea laga bimar bishi ulai ase.

Sita- Hosa ase toh. Aro ami khan, organic farming, etu kurea para he ami khan laga mati bi bachai kena rakhi ase. Ami khan ta te, mol bhal thaka etu khan bi bhorkhon ahi she koile sabi nah! ami khan dawai khan cholai thaki she koi le tu, dawai khan tu loi jai kena nodi khan nah! etu khan ke bi letra banai. Kintu... ami khan dawai eku nacholai kena nijor parea, banai loa laga mol, etu juntu khan hobo pare, ami khan kheti te nah! kheti kurea ekela nahoi kena juntu khan bi loi pali bole pare toh. Aro juntu palea logote, tar laga pisap paikhana khan tu loi mol hisap te ami khan kheti te chola bole pare. Dhan kheti te hobi, saat sobji laga kheti te chola bole pare. Etu para he ami khan, ami khan laga hawa paani ke bi bachai rakhi bole pare, mati ke bi bachai rakhi bole pare nah!

Jovi- Hoi. Ami khan bi ene jani- jani kena he bhabi bi nah! Jai kena poila agari manu khan... mar Naga manu khan hoi le bi nah! tar khan tu hoile, dawai- sawai alak aji kali chola laga etu khan tu janea bi najane, chola bi nacholai toh nah! Toh... tar khan tu, kheti te bhal mati, etu mol bishi thaka jaga khan te kheti kuri bo ki pa bo, anach etu ani kena kha para bi gao beya hoi she etu laga eku najane toh. Aro bimar samar bi eku na ulai, etu khai kena gao bi aro swach bi eman bhal hoi kena thake toh nah! amar khan fertilizers khan hoi le bi... alak- alak aro insecticides ki- ki herbicides koi kena alak- alak cholai toh nah! puka hata laga... aro bimar hata laga, alak- alak cholai toh. Toh... etu khan chola nimite, bimar- samar bi bishi hoi jai she, aro etea apuni koa nishina, sop manu bi etu khan chari kena he, ami khan kinika kuri kena, organic farming suru kuri bo, etu he sops bhal hobo toh nah!

Sita- Hoi, forefathers khan, dawai tu ki ase najani kena ahi she, kintu, manu bishi- bishi hoa laga hisap te ahi kena technology khan bishi hoa laga nah! Etu karone, mid 1930s - 40s enika khan te, dawai loi suru cholai kena ahi ase toh. Dawai cholai kena kheti bari kurea tu, ahi kena amar khan laga mati ke morai dea nah! Ek bar kuri le, tar tu ek saal te, ekta

sobji lupi le duita rupi bole napare. Ami khan dawai he bar- bar loi chola bole lage nah! Enika hoi kena khali mati ke he morai dea nahoi kena, apuni bi jani ase, hawa paani ke bi letra banai dea nah! aro manu laga gao ke hoi le bi, ami khan nabha bi kena duk- suk bimar khan bishi dhuri ase. Etu karone ami khan ahe kena organic farming etu kurea tu, ami khan ahi kena, bhorkhon homoi te paani bishi gire nah! enika homoi te hoi le bi, organic farming etu kurea tu, mati bachai rakhi bole pare dae. Achha, aro ahi kena amar state Nagaland te area hisap te, amar khan kheti bari kurea laga sai le nah! sixteen thousand five hundred seventy nine sq km ase dae, amar khan laga mati tu bhal nah! aro hawa paani hoi le bi bhal enika hoa karone, mane.... mar khan laga mati tu alop balu mati nishina nah! aro tate mol thaka enika amar khan dikhea karone, organic farming, mane.... kheti bari kurea tu bishi bhal. Aro ji loi kena rupi le bi bhal ulai. Etu karone, tate amar khan eku dawai khan milai kena kheti kuri bole kam nai. amar khan laga, mati bhal thaka tu nah! tate mar khan aro bhal kuri kena saat sobji loi rupi bole ase koi le, nijor parea laga mol khan juntu laga na hoi le bi ghor laga letra khan para aji kali tu... bishi bhak mol banai toh nah! etu loi kena saat sobji khan loi rupi bole pari ase.

Jovi- Achha toh... mane. amar khan laga, mati tu dawai sawai nacholai le bi anach tu bhal ula bo le parea laga mati he ase koi le, amar khan etu dawai khan chola bole kam he nai toh. Toh.... manu koa nishina, ami hunea tu nah! Judi ami khan ekta kheti te, dawai nahoi le bi alak- alak fertilizers khan loi kena cholai she koi le mane, aha saal te etu, dawai na di le bhal na ulai anach tu enika koi ase toh.

Sita- Hosa ase toh. Etu karone, amar khan laga mati tu beya hoi ase toh din- din te. Aro ami khan kheti bari kurea laga percentage bi sai she koile, 70% kheti bari kurea te he ami khan pet pali ase toh, amar state Nagaland te. Etu karone amar khan kinika mati ke bachai rakhi bo etu tu first amar khan mon te loi kena etu laga hisap te he kheti bari bi kuri bole lage ho.

Jovi- Hosa ase, poila homoi te tu hoile, ami khan etu upor te, jankari bi komti hoi kena, najani kena he cholai kena ahi she hobo hola nah! Hoi le bi etea tu hoi le, amar khan jankari pai loi she, toh.... poiloa ki kuri kena ahi she, etu khan chari kena, ki kuri le bhal hobo aro amar gao nimite bi aro hawa paani karone bi bhal hobo etu khan hisap te he ami khan ako bi gurai jai kena, poila agari manu khan kinika hisap te kheti kuri she etu nium te aro bi jai le bishi bhal nah!